




PROMOVER L'EMPRENDER ED IL SVILUP

*La scola po far plaschair, ella po dentant er
esser bravamain stentusa. E mintgatant na giri
betg uschia, sco quai ch'i stuess.*

En connex cun il svilup d'uffants en la scolina, cun l'entrada en scola e cun l'emprender en scola poi dar difficultads ed i pon nascher dumondas. Nus As sustegnain da chattar – ensemen cun la scola – soluziuns raschunavlas per Voss uffant.



SUSTEGNAIR ILS GENITURS

*Uffants èn mirveglius, creativs, leghers, amuraivels,
engraziaivels, deschents ed interessads. Ma betg adina.
Mintgatant pon els er propi dar sin la gnerva.*

L'incumbensa d'accompagnar ils uffants durant lur svilup è fascinanta, dentant er pretensiusa. Ins vegn adina puspè confruntada u confruntà cun novas dumondas. Co duai jau reagir en questa situaziun? Tge è gist, tge è fauss? Nus As stain a disposiziun, sche Vus vulais discutir dumondas davart l'educaziun cun ina persuna spezialisada externa.t



ACCOMPAGNAR UFFANTS E GIUVENILS

*Uffants e giuvenils scuvran mintga di in toc
dal mund. Ed in toc d'els sezs. Co duain ins
qua adina savair, tge ch'è gist e tge betg.*

Uffants e giuvenils ston dumagnar pretensiuns multifaras en lur mintgadi. Latiers vegnan els accompagnads da lur geniturs e da lur persunas d'instrucziun. En bleras situaziuns po in discours cun ina spezialista externa u cun in spezialist extern gidar a chattar in puntg da vista nov ed a scuvrir autras pussaivladads d'agir. Nus accompagnain uffants e giuvenils e tschertgain ensemen cun els pussaivladads, co ch'els pon dumagnar las pretensiuns dal mintgadi e co ch'els pon cuntanscher lur finamiras personalas.



CHATTAR COMMUNABLAMAIN SOLUZIUNS

*En lur svilup van uffants vias fitg differentas. Mintgatant
è quai ina spassegiada patgifica, mintgatant ina tura da
muntogna pretensiusa. Ed i dat lieus, nua ch'i dovra ina
punt per pudair ir vinavant.*

Ensemen cun Vus guardain nus detagliadamain la situaziun da Voss uffant e sviluppain ensemen soluziuns solidas. Ils singuls pass latiers vegnan discutads en moda conscienziusa.

SERVETSCH PSICOLOGIC DA SCOLA DAL CHANTUN GRISCHUN

CUSSEGLIAZIUN DA SCOLA E D'EDUCAZIUN

CHATTAR COMMUNABLAMAIN SOLUZIUNS

PURSCHIDA

Scleriment e cussegliaziun en cas da:

- particularitads en il svilup
- scolarisaziun
- difficultads d'emprende
- esser sutdumandà
- particularitads en il cumportament
- temas
- difficultads socialas
- Cussegliaziun d'educaziun per ils geniturs
- Accompagnament d'uffants e da giuvenils
- Cussegliaziun per persunas d'instrucziun
- Cussegliaziun d'autoritads da scola
- Intervenziun tar crisas en il cas singul ed en classas da scola
- Mediaziun en cas da conflicts
- Sustegn per l'emprim agid psicologic per scolas

ANNUNZIA

L'annunzia po vegnir fatga telefonicamain, en scrit u per e-mail tras ils geniturs, tras la persuna d'instrucziun u tras autras persunas da referiment sco pedagogs e pedagogs curativs u medias e medis d'uffants. In'annunzia premetta ch'ils geniturs sajan perencletgs. Uffants pli vegls e giuvenils pon er s'annunziar sezs tar la cussegliaziun da scola e d'educaziun.

PROCEDER

Noss proceder vegn mintgamai adattà al problem. Quai po ir d'in contact per telefon fin ad in accompagnament durant plirs mais. Per regla As envidain nus suenter l'annunzia ad in emprim discurs per discurre cun Vus sur dal svilup e sur dals conturns da l'uffant sco er sur da sias difficultads e sur da sias fermezas. Tut tenor il problem datti suenter ina fasa da scleriment, nua ch'i vegnan rimnadas ulteriuras infurmaziuns. Quella duai pussibilitar da chapir meglier la situaziun actuala. Ils resultats vegnan discutads cuminaivlamain. En cas da basegn vegnan instradadas mesiras da promoziun adattadas. En cas da problems da scola vegn integrada la persuna d'instrucziun.

CUSTS

La cussegliaziun è gratuita.

OBLIGAZIUN DA DISCREZIUN

Tut las cussegliastras e tut ils cussegliastrs èn suttamess a l'obligaziun da discreziun.

ORGANISAZIUN

Il servetsch psicologic da scola dal chantun Grischun è in servetsch chantunal ch'è integrà en l'uffizi per la scola populara ed il sport (USS). Ils posts regionalas da la cussegliaziun da scola e d'educaziun èn repartids en tut il chantun e permettan da metter a disposiziun las purschidas dapertut en las trais linguas chantunalas.

